

LXXXIV

8 Augustus 1963

Hartog Dr. J.
Wilhelminastr



OBSERVADOR

Semanario Informativo  Netamente Arubiano



Burny Every
den comedia
profesional



Noticianan local

BURNY EVERY A TUMA E PASO PROFESIONAL DEN COMEDIA

"Den Burny Every tin talento" ken cu ta lo a bisa si nan a hanja e oportunidad di mir'é un diezun anja pasa durante un comedia escolar den cual e a imita e Santisima Virgen Maria na un manera como si fuera ta un biaha mas e Santisima a aparecé na mundu.

Awe e talento ey a jega na su punto cumbre despues cu concedornan di cultura for di Hulanda cu intervencion di Sticusa a duna Burny un contrato di 1 anja pa e dreña comedia profesional na Amsterdam.

— o —

Mester ta un orgullo pa Burny Every cu e no tin di pasa e 4 anja di school, manera otro comediantenan amateur na Hulanda, prome cu e dreña comedia profesional. E contrato di prueba pa 1 aña cu el a firma cu e conocido Toneelgroep "Centrum" di Amsterdam ta dunele e chens pa mesora e cumenza su carrera profesional cu e grupo. Kiko a pone Burny tuma un paso asina grandi cu siguramente no ta un custumber di nos hendenan di Aruba?

"Brio", hopi hende lo contesta. Pero den e caso aki ta e curazon di senjorita Every ta asina pega cu comedia y ora cu e curazon ta bati pa un cos, ta difícil oponé contra e deseo aki.

For di chikito, tempo di school aki na Aruba, y mas despues durante su estudio pa maestra di school na Hulanda, Burny Every a gusta para riba podio.

Ta un encanto pa tendé recita un poesía. E voz dushi y e cambio di tonada ta garra bo oído y ta lagabo biba henteramente cu e pieza cu ta worde declama. Hopi di su poesianan a ser publica den revistanan cultural na Hulanda, manera por ehemplo e revista "De Gids".



Burny Every

Desde cu el a regresa di Hulanda como maestra di school, Burny a sabi di eleva su popularidad den nos comunidad pa medio di su actividadnan.

Na anja 1960 su belleza y su gracia a haciele Reina di Carnaval di Aruba.

Ya den e prome comedia despues di su regreso, su actuacion a cumenza pidi respet. Asina a socode cu Burny, pa medio di su talento, a haci cu awendía tin mas comediantenan Arubano cu ta hanja un chens den comedianan, cu antes tabata hanja participacion di solamente e Hulandesnan Europeo.

Tabata na fin di anja pasa ora cu dos persona di Sticusa a bishita Aruba cu e plannan a worde traha pa Burny dreña comedia profesional.

— o —

Dia 9 di agosto, manjan, e viaha pa Hulanda lo cumenza via New York, na unda Burny lo pasa algun dia di vacacion.

E contrato cu el a firma cu e Toneelgroep "Centrum", grupo cu ta conta entre su actornan e conocido director Egbert van Pa-

ridon y e regisor Guus Hermus, ta pa 1 anja.

Si despues di e anja aki Burny no gusta, anto su pasashi lo worde paga y e lo regresa Aruba. Pero si e gusta y e otro partido tambe gusta anto e contrato por worde alargá.

Srta. Every lo viaha jen di optimismo pa su carrera nobo y conociendo é como un di esnan cu ta "jega, mira y vence" nos ta sigur cu e lo cosecha laureles na Hulanda, aunke nos tin di confesa cu pa nos y pa hopi otro, ta duele pa falta Burny maske ta pa un anja so for di Aruba.

■

GOBIERNO KIER BAI MATA "CATOCHI" PA SEMPER

Na Corsow, e cuna di catochi na Antillas, Gezaghebber M.P. Gorsira y procureur-general mr. I. de Castro Yohai a informa siman pasa, cu medidanan drastico lo worde tuma contra bendemento di number, o catochi, na Corsow y Aruba. Lo nan tuma paso tambe contra otro clase di wega di placa manera: Cinco y Seis, e pool di futbol, programa na radio, durante cual nan ta rifa diferente premionan.

— o —

Ya autoridad a cumenza actuá mas severo contra bendedornan di number. Varios motibo a worde duna pakiko a dicidi na tuma medidanan mas severo. Na prome lugá e wega di number ta contra di e "loterijverordening", y di dos e tantísimo kehonan cu polis a hanja en relacion cu e wega aki.

Tin hende ta hunga nan salario di siman y placa di mantencion na number, ordu publico ta worde stroba, peleanan cu hinkamento ta tuma lugá y muchanan chikitu ta worde desprecia, pa motibo cu mama ta mas pro di catochi.

Mencion a ser haci tambe di bendedornan di number cu a bira